



Fasnacht 2017

Bebb-E

Mir zeige euch d Zuekunft vo dr Fasnacht
Wo me alles im Internet und em Kompi macht
Wo Roboter am Cortège dien laufe
Und GPS-Blagette verkauffe
kasch dini Määlsuppe jetz lo skenne
Um zluenge wie viel Kalorie d muesch verbrenne
D Ladäärne sin plotteti Oli Maier Schilder
Mit grosse Bildschirm und dreidimensionale Bilder
Abstraggt wie vom Josi Beuys
Also fyr d`Bebbi nüt neus
Das isch scho fascht zem lache
Au uff de Ladäärne duet Zalando Wärbig mache
Traktore vor de Wäge isch voll us dr Mode
Nei die fliege jetzt kurz iberem Bode
Apropos Mode und suscht so ne Pamp
Es trage denn alli s Frisürli vom Trump
D Bebbi sin natüürlig no so wie immer
Mir nämme keini Fraue drum wird's au nid schlimmer
Willsch in Zuekunft Fasnacht mache
Bruuchsch nimm so altbacheni Sache
Wie en Zeedel zum Verdaile
Dää kasch allefalls no maile
Eher duesch, was sich duet Riime
Diräggt in d Biire iine Biime
Will mir entwiggle uns jo wyyter
Vom Mensch zum Roboter – das isch schitter
Der Voordraab isch scho digg am Baue
D Professore dien d Inelligänz iine haue
Und scho isch s gschafft mir sinn derbi
Ändlig sinn mir E – Bebb – E
Es Zwischeding Computer – Mensch
Wo d nur uss Science Fiction kennsch
Der Tambourmajor duesch kuum erkenne
Kenntsch au in Ziiri als Böög verbrenne
Nur als Ziircher kasch kai Bebb-E syy
Bisch nur als rächte Maa derbi
Uss Basel oder der Regio
Um d Regio do sinn mir froo
Will Noochwuggs numme uss der Stadt
Das wär zwar sicherlich sau glatt
Doch laider git s doo nimm soo vyyl
Mit unserem gsuechte Wunsch-Brofil
Drumm baue mir jetzt Bebb-E Roboter
Die sind im Vergliich mit Landschäftler no flotter
Verlange kai Gäld, sinn ganz liicht zum pfläage
Die erschte Landschäftler wo fir d Stadt sinn e Säage
Und wenn sie denn motze und mache uns Mie
Denn kasch ne ganz aifach der Stegger zie
Glaar, so Roboter sinn scho kai Zier
Aber ganz eerlig, si suffe au nit soo vyyl Bier
Drumm kasch si denn schpööter au in Stamm lo goo
Will deert wiirsch jo numme mit Bierbass uffgnoo
Wo bewiist, dass de dringgfescht und gaicht bisch mit Bier
Und in der Cortègepause maggsch suffe, mindischtens vier
Drumm iebe mir Junge Bebb – E ganz flissig
Und mache d Inschtruggter do dermit schissig
Doch Roboter - das kaa me uns nit verheele
Muess me jo zwischeduur au Eele
Und jetzt dien mir s au ändlig begriffe
Worum die vom Stamm am Cortège nie pfyffe
Au s Drummle fällt schwäär und deent nit so toll
Wenn vom vyyle Bier scho d Lampe hesch voll
Also pfyffe und drummle mir mit Bläsier
Und dringge bim Halt lieber Sirup als Bier
So deent s bi uns Junge perfäggt und rasant
Doo schtuunt am Schtrooserand mänge Passant
und s isch glaar wenn s soo deent, das wär jo glacht
kas numme si, wenn s isch vo Bebb – E`s gmacht

Wotsch leere pfyffe oder drummle?

Yschrybge fir Buebe ab dr erschte Klass (7 jährig) fir d Drummel- und Pfyfferschuel, sinn an de Samschdige, 18.03.2017 und 25.03.2017 jewyyls vom ains bis am vieri am Nomidaag im Glyggekäller am Luftgässli 5 bim Banggverein.

Usskunft gitt dr Obmaa: Thomi Reinhard,
079 261 71 02 / thomi.reinhard@bluewin.ch

Unter jungibebbi.ch findsch no me Informatione iber uns!
